

ጳውሎስ ዲሞቴዮስ ጻፊና ምዓንጽ ኪታ ጋሳ ቆፋ

ጳውሎስ ዲሞቴዮስ ጻፊና ምዓንጽ ኪታይ፤ ጳውሎስ ለኢሲፌ አሴይሳኔ ጳውሎስ ማታን ማዲያ ናግቴሳ ዲሞቴዮስ ዘሪዳ ዘሪያ አይኪስ። ሄ ዘሪያ አይፌ ቆፋይ፤ «ጌንጫን ሚናናው ቤሴስ» ጌይሳ። ዲሞቴዮስ ዘሬኔ ሚንሴሶ ቃላ ኤኪዳይ፤ ዮሱስ ኪሪስቶስ ተማ ማርካታና ሜላ ምንጌላ ቃላኔ ጋልዓ ጫቆ ተሚርቲያ ሚንሲዲ አይካና ሜላኔ ሜቶይኔ ኢያይ ዳሪኮካ ታማርሶኒኔ ምንጌላ ሳባኮን ሚናና ሜላሳ።

ዲሞቴዮስ ሃዳ ኤያቴሳ ፓላማፔ ሃካና ሜላ ዱማ ሚና ዘሬይ ኢያው ኢሜቲስ። ሄሳ ሜላ አዳይ አሳ ዳይሴሲፔ አቲን አይኮካ ማዴና።

ሄ ኡባን ዲሞቴዮስ አኬካናው ቤሲያባይ፤ ጳውሎስ ሃናታኔ ኢያ ዱሳ ቆፋ ሄሲካ፤ ኢያ አማኑዋ፤ ኢያ ጌንጫ፤ ኢያ ሲቁዋ፤ ኢያ ዳንዳዓኔ ኢያ ጋኪዳ ሜቱዋ ሴሚሶ አሲዲ ካላናይሳ። ጳውሎስ ሃ ኪታ ጻፊዳይ፤ ኢ ባ ምሳ ኦንጊዲ ሃይቆስ ጊጌቲዳ ምዴና።

2 ዲሞቴዮስ ኪታ አይፌ ቆፋታ

ጌሎ ቆፋ 1:1-2

ዲሞቴዮስ ኢሜቲዳ ዘሪያ 1:3-2:13

ዉርሴሳ ምዲያባ 2:14-4:5

ጳውሎስ ሃኒዲ ዴዲያ ዱሳ 4:6-18

ኩሻ ቆፋ 4:19-22

1 ያሳ ሼኔን፤ ዮሱስ ኪሪስቶስን ቤንቲዳ ዴያ ኡፋይሳ ማርካታናው ዮሱስ ኪሪስቶስ ሃዋሬ ጊዲዳ ጳውሎስ፤ 2 ታ ዶሲያ ናዓ ዲሞቴዮስ ኪቴቲዳ ኪታ።

ያሳ አዋፔኔ ኑ ጎዳ ኪሪስቶስ ዮሱሳፔ አዶ ኬሃቴሳይ፤ ማሮቴሳይኔ ሳሮቴሳይ ኔው ጊዶ።

ዲሞቴዮስ ኢሜቲዳ ዘሪያ

3 ታኒ፤ ታ ምሳን ቃማኔ ጋላስ ኔና ቆፓይስ። ታኒ ምሲያ ምዴ ታ ማይዛታ ያሳኔ ታኒ ሎዎ ካሃን ሃጋዚያ ያሳ ኔ ጊሾ ጋላታይስ።

4 ታኒ ኔ አፋሳ ቆፓይስ፤ ኔና ቤዓዳ ኡፋይታናው ዳሮ ላሞታይስ።

5 ቃሲ ኔው ዴዲያ ቱማ አማኑዋ ኤራይስ። ሄ አማኖይ ቤኒ ኔ ዎጋ አዬ ሎይዲኒኔ ኔ አዬ ኤወኒቂን ዴዲያ አማኑዋ ሜላ።
 6 ሄሳ ጊሾ፣ ታኒ ታ ኩሺያ ኔ ቦላ ዎሲዳ ዎዴ ያሳይ ኔው ኢሚዳ ኢሞታ ኔኒ ዛራ ኤላና ሜላ አኬኪሳይስ። 7 አይስ ጊኮ፣ ያሳይ ኑስ ዎልቃ፣ ሲቆኔ ኑ ሁዔ ሃሪያ አያና ኢሚስፎ አቲን ያሻ አያና ኢሚቤና።

8 ሂዛ፣ ኑ ጎዳስ ማርካታናው ዩላቶፓ፤ ቃሲ ኢያ ጊሾ ቃሼቲዳ ታናንካ ዩላቶፓ። ሺን ያሳይ ኔው ኢሚያ ዎልቃን ዎንጌላ ጊሾ ታራ ሜቶ ኤካ። 9 ያሳይ ባ ሼኔኒኔ ባ አዶ ኬሃቴላን ኑና አሺዲ፣ ባ ጊሻ ዴሬ አላናው ኑና ዶሪስፎ አቲን ኑኒ አሲዳ አሱዋ ጊሾ ጊዴና። ሃ አዶ ኬሃቴላ ኪሪስቶስ ዩሱሳ ባጋራ አላሜይ ሜዴታናፎ ሲንሴ ኑስ ኢሚስ። 10 ሃዲ ሃ አዶ ኬሃቴላይ ኑና አሺያ ኪሪስቶስ ዩሱሳ ዩሳን ቆንጨስ። ኢ ሃይቆ ዎልቃ ዳይሲዲ፣ ዎንጌላ ባጋራ ዳዮና ዴዎ ኑስ ቆንጨሲስ።

11 ታኒ ዎንጌላ ሳባኬ፣ ሃዋሬኔ አስታማሬ ጊዳና ሜላ ያሳይ ታና ዶሪስ። 12 ታኒ ሄሳ ጊሾ ሃ ሜቱዋ ኤካይስ፤ ሺን ታ አማኔይ አኒኮ ኤሪያ ጊሾ ዩላቲኬ። ታው ኢሜቲዳ ሃዳራ ሄ ጋላሳይ ጋካናው ኢ ናጋናው ዳንዳዔይሳ ኤራይስ።

13 ታኒ ኔና ታማርሲዳ ቱማ ቃላ ሌሚሶ አላ አይካዳ ኪሪስቶስ ዩሱሳ ባጋራ ኑባ ጊዲዳ አማኑዋኒኔ ሲቁዋን ዴዳ። 14 ኑ ጊዴን ዴዲያ ጊሻ አያና ዎልቃን ኔው ኢሜቲዳ ሎዎ ሃዳራ ናጋ።

15 ኢሲያ ቤታን ዴዲያ ኡባይ ታፎ ሃኪዳይሳ ኤራሳ፤ ኤንታ ጊዴን ፊጌሱሲኔ ሄርሞጌኔሲ ዴዎሶና።

16 አኒስፎሪ ታና ዳሮ ዎዴ ሚንሴሲዳ ጊሾ ጎዳይ ኢያ ሶ አሳስ ቃዴቶ። ታኒ ቃሾ ኬሳን ዴዲያ ዎዴ ኢ ታናን ዩላቲቤና።
 17 ሄሳ ቦላ ኢ ሮሜ ካታማ ዩዳ ዎዴ ታና ሚንሲ ኮዩዲ ዴሚስ።
 18 ወርሴላ ጋላሳን ጎዳይ ኢያው ቃዴታና ሜላ ታኒ ጎዳ ዎሳይስ። ኤፌሶና ካታማን ኢ ታና አይ ሜላ ማዲዳኮ ኔ ሎይላ ኤራሳ።

2

ዩሱስ ኪሪስቶሳን ሚና

- 1 ሂዛ፣ ታ ናኖው፣ ኪሪስቶስ ዩሱሳን ዴዲያ ማርቱላን ሚና።
- 2 ዳሮ ማርካታ ሲንላን ታኒ ኔና ታማርሲዳ ቲሚርቲያ፣ ሃራታ ታማርሳናው ዳንዳዲያ አማኔቲዳ አሳስ ሃዳራ ኢማ።
- 3 ዩሱስ ኪሪስቶሳስ አማንሲያ ዎታዳሬ ጊዳዳ ታራ ሜቶ ኤካ።
- 4 አላ ዎታዳሬይ ባ ሃላቃ ኡፋይሳናው ጊጌቴሲፎ አቲን ሃራ አሶን ባና ፔሼና። 5 ሄሳዳካ፣ ጋዴ ዎዲያ አኒካ ቤሲያ አጌራ ጋዴቶና

ኢጊኮ ዎይቶ ኤኪና። 6 ጎሻን ዳቡሪያ ጎሻንቾይ ባ ዳቡራ አይፊያፕ ሚያ ኮይሮ አሲ ጊዳናው ቤሴስ። 7 ኔ አኬካና ሜላ ጎዳይ ኔና ማዳና ጊሾ ታ ኔው አዲዳባ ኔ ዎዛናን ናጋ።

8 ታኒ ማርካቲያ ዎንጌላ ሜላ ሃይቆፕ ዴንዲዳ፣ ዳዊቴ ዜሬሲ ጊዲዳ ዮሱስ ኪሪስቶሳ ቆፓ። 9 ታኒ ዎንጌላ አዲያ ጊሾ ኢታባ አሲዳ አሳዳ፣ ቃሼታዳ ሜቶ ኤካስ። ሺን ያሳ ቃላይ ቃሼቴና። 10 ሄሳ ጊሾ፣ ያሳይ ዶሪዳ አሳቲ ኪሪስቶስ ዮሱሳን ዴዲያ አቶቴሳ ሜሪና ቦንቹዋራ ኤካና ሜላ ኤንታ ጊሾ ኡባባን ዋዮታይስ።

11 ሃይሳዳ ያጊያ ቱማ ቃሊ ዴዴስ፤

«ኑኒ ኢያራ ሃይቂዳባ ጊዲኮ፣

ኢያራ ኢሲፌ ዴዳና።

12 ኑኒ ጌንጩኮ፣

ኢያራ ኢሲፌ ካዎታና።

ኑኒ ኢያ ካዲኮ፣

ኢ ኑና ካዳና።

13 ኑኒ አማኔቶና ኢጊኮ፣

ኢ አማኔቲዳይሳ ጊዲዲ ዳና።

አይስ ጊኮ፣ ኢ ባና

ካዳናው ዳንዳዴና» ያጌስ።

ሚኖ አሳንቾ

14 ኔኒ ኤንታ ሃይሳ አኬኪሳ፤ ኤንቲ ቃላታ ጋሶን ፓላሞና ሜላ፣ ጎዳ ሲንሳን ኤንታ ዞራ። ሄሲ ሲዴይሳታ ዳይሴሲፕ አቲን አይኮካ ማዴና። 15 ኔኒ ቱማ ቃላ ሱሬቴሳን ታማርሴይሳኔ ዮላዮና አሳንቾ ጊዳዳ፣ ያሳይ ናሺያ አሳዳ፣ ኔናቴሳ ኢያው ኢማናው ሚና። 16 ሺን ሃ አላሚያስ ኢንጄቲያ ጎዮና ኦዳፕ ባቃታ። ሄሳ ሜላ ኦዳይ አሴ ያሳፌ ሃሴስ። 17 ሄሳ ሜላ ኦዳይ አሳቴሲ ሚዲጊያ ፓዮና ዎይዛዜራ ማዱንሳ ሜላ። ሄሳ ሜላ ኦዳ ኦዴቴይሳታ ጊዶፌ ሄሜኔዮሲኔ ፊሊዎሲ ዴዎሶና። 18 ሃ አሳቲ ቱማ አጊያ አጊዲ፣ «ሃይቂዳ አሳይ ሃይቆፕ ቤኒ ዴንዲዶሶና» ያጊዲ ጉሳ አሳታ አማኑዋ ዳይሲዶሶና።

19 ጊዶሺን፣ ያሳይ ሚኖ ዛላ ሂዲዳ ጊሾ ቃዳናው ዳንዳዴና። ኢያ ቦላ፣ «ጎዳይ ባይሳታ ኤሬስ። ጎዳ ሱንሳ ዌጊያ ኦኒካ ኢታ አሶፕ ሃኮ» ያጊያ ቃላይ ዓፌቲስ።

20 ኢሲ ጊታ ኬሳን ዎርቃፌ ዎይኮ ቢራፕ አሴቲዳ ሚሼታ ዓላላ ጊዶናሺን ሚሳፌ ዎይኮ ኡርቃፌ አሴቲዳ ሚሼቲካ ዴዎሶና። ሄሳታፕ ባጋቲ ቦንቾ አሶስ፣ ቃሲ ባጋቲ ቶሼቲያ አሶስ ፕዎሶና።

21 ሄሳ ጊሾ፣ ኦኒካ ኢታ ኡባ አጊኮኔ ባና ጌሺኮ፣ ቦንቾ አሶ

2:12 ማቶ 10:33፤ ሉቃ 12:9 2:19 ታይ 16:5

አሲያ ሚሼ ጊዳና። ኤንታ ደዎይ ጌሺኔ ጎዳ ኡፋይሲያባ፣ ቃሲ ኤንቲ ሎዎ አሶ ኡባ አሳናው ዳንዳዔይሳታ ጊዳና።

22 ናዓቴሳ ኢታ አሙዋፔ ባቃታ። ጌሻ ዎዛናን ጎዳ ዩጊያ አሳታራ ኢሲፊ። ዓሎቴሳ፣ አማኑዋ፣ ሲቆኔ ሳሮቴሳ ካላ።

23 ሺን አሺ ሜዴይሳ ኤራዳ ኤያቴሲኔ ሃዳ ጊዲዳ ፓላማፔ ሃካ። 24 ጎዳ አሳንቾይ አሳ ኡባስ ኪሃ፣ ሎዎ ታማርሴይሳኔ ዳንዳዓንቾ ጊዳናው ቤሴሲፔ አቲን አዩታናው ቤሴና። 25 ኢ ባራ ኤቁቴይሳታ አሽኪቴሳን ሴሬይሳ ጊዳናው ቤሴስ። ኤንቲ ባንታ ናጋራፔ ሲሚዲ ቱማ ኤራናዳ ያሳይ አሳኔኮ አኒ ኤሪ። 26 ኤንቲ ባንታ ዎዛናኮ ሲሚዲ ባ ሸኒያ አሳና ሜላ ኤንታ አይኪዳ ዓላሄ ዓላሄፔ ኬሲ ኤካና።

3

ዉርሴሳ ጋላሳ ማላታታ

1 ዉርሴሳ ጋላሳን ኡንዔሲያ ዎዴይ ያናይሳ ኤራ። 2 አሳይ ባንታና ዶሴይሳታ፣ ሚሼ ሲቆይሳታ፣ ጩቁቴይሳታ፣ አቶሬይሳታ፣ ጫዩይሳታ፣ ባንታና ዩሊዳይሳታስ ኪቴቶናይስታ፣ ጋላቶናይስታ፣ ጌሻቴሲ ባይናይሳታ፣ 3 ሲቆይ ባይናይሳታ፣ ማሮቴሲ ኤሮናይሳታ፣ ዘጊሬይሳታ፣ ባንታና ሃሮናይሳታ፣ ቃዴይ ባይናይሳታ፣ ሎዎ ዶሶናይሳታ፣ 4 ሞርኬስ አሲ ኢሜይሳታ፣ ቆሬ ባይናይሳታ፣ አቶሮን ሱጌቴይሳታ፣ ያሳፊ አሲዲ አሾ ኡፋይሳናው ዶሴይሳታ ጊዳና። 5 ኤንቲ አማኒያ ዳዮሶናፔ አቲን አማኖ ዎልቃ ካዶሶና፤ ኔኒ ሄሳ ሜላ አሳታፔ ባቃታ።

6 ኤንታፊ ኢሶቲ ኢሶቲ አሳ ኬሲ ጌሊዲ ናጋራን አይኪቴዳይሳታኔ ዱማ ዱማ አሞን ሱጌቲያ ዳቡራንቾ ማጫሳታ ቦላ ጎዳቶሶና። 7 ሄ ማጫሳቲ ኡባ ዎዴ ታማሮሶና፣ ሺን ቱማ ኤራናው ዳንዳዎኮና። 8 ያኔሲኔ ያምባሬሲ ሙሴራ ኤቁቴዳይሳዳ ሃ አሳቲ ጉጌይ አሳናይሳታኔ አማኖን ኩንዲዳ አሳታ ጊዲያ ጊሾ ቱማራ ኤቁቶሶና። 9 ሺን ያኔሳኔ ያምባሬሳ ኤያቴሳይ ቆንጩዳይሳዳ ኤንታ ኤያቴሳይካ አሳ ኡባ ሲንሳን ቆንጫና ጊሾ ኤንታው ሃኔና።

ዉርሴሳ ዞሪ

10 ሺን ኔኒ ታ ቲሚርቲያ፣ ታ ዱሳ፣ ታ ቆፋ፣ ታ አማኑዋ፣ ታ ዳንዳዓ፣ ታ ሲቁዋ፣ ታ ጌንጫ፣ 11 ታ ዩዴቴሳኔ ታ ሜቱዋ ኤራሳ፣ አንዎኪያን፣ ኢቆኒዮኔን፣ ሊስዒራ ካታማታን ታና ጋኪዳባኔ ታኒ ዳንዳዒዳ ሜቱዋ ኤራሳ፤ ጎዳይ ታና ሄ ኡባፊ

አሺስ። 12 ኪሪስቶስ ዮሱሳን ያሳ ኡፋይሲያ ደዎ ዳናው ኮያ ኡባይ ጎዴታና። 13 ኢታ አሳቲኔ ባሌሴይሳቲ ባንታው ባሌቲሼኔ ሃራታ ባሌሴሼ ካሴፔ ኢቲ ኢቲ ባና።

14 ሺን ኔ ታማሪዳ ቱማኒኔ ኔ አማኒዳ አማኑዋን ኤቃ። ኔ አዴፌ ታማሪዳኮ ኤራሳ። 15 ኔኒ ኔ ናዓቴሳፌ ዶማዳ ኪሪስቶስ ዮሱሳ አማናዳ አቶቴሲ ዴሚያ ጨንጫቴሲ ኢማናው ዳንዳዲያ ጌሻ ማፃፋታ ኤራዳሳ። 16 ጌሻ ማፃፋ ኡባይ ያሳፌ ኢሜቲዳ ቃላ። ሄ ማፃፋይ ቱማ ታማርሳናው፣ ባሊዳይሳታ ሴራናው፣ ሱሪሳናውኔ ዊሎቴሳ ዱሳስ ኮሺያ ዞሪ ኢማናው ማዴስ። 17 ያሳ አሲ ፖሎኔ ሎዎ አሶ ኡባ አሳናው ጊጊዳይሳ ጊዳና ሜላ ማዴስ።

4

1 ታኒ ኔና ያሳ ሲንሳኒኔ፣ ካዎ ጊዲዲ ሃራናው ቆንጨያ ዎዴ ፓፃታኔ ሃይቂዳይሳታ ፐርዳናው ዴዲያ ኪሪስቶስ ዮሱሳ ሲንሳን ዞራይስ። 2 ቃላ አዳ፤ ዎዴይ ኢንጄቲን ኢንጄቶና ኢዊን ሚናዳ አዳ። ዳሮ ዳንዳዳኒኔ ታማርሶን አሳ ዞራ፣ ሴራኔ ዴንፊሳ። 3 አሳይ ቱማ ቲሚርቲያ ሲያና ኢዊያ ዎዴይ ያና። ኤንቲ ባንታ አሙዋ ካሊዲ፣ ባንታው ሲዳናው ኡፋይሲያባ አዲያ አስታማራታ ሺሾሶና። 4 ኤንቲ ቱማ ቲሚርቲያ አጊዲ፣ ቱማ ጊዶና አዳ ሲዳናው ባንታ ሃይሳ ዛሮሶና። 5 ሺን ኔኒ ኡባባን ኔና ሃራ። ሜቱዋ ዳንዳዳ። ዎንጌላ ማርካቴሳ አሱዋ አሳ። ኔው ኢሜቲዳ ያሳ አሶ ኡባ ፖላ።

6 ታኒ ያርሼቲያ ዎዴይ ጋኪስ፤ ሃ አላሚያ አጋዳ ቢያ ዎዴይ ማቲስ። 7 ታኒ ሎዎ አላ አሌታስ፤ ታ ጋዲያ ዎፃዳ ዉርሳስ፤ አማኑዋ ናጋስ። 8 ሲንሳፌ ዊሎቴሳ ካላቻይ * ታና ናጌስ። ሄሳ ዊሎ ፐርዳ ፐርዲያ ጎዳይ ሄ ጋላስ ታው ኢማና። ሄሳ ታ ፃላላስ ጊዶናሺን ኢያ ቆንጨሳ አሞቲያ ኡባስ ኢማና።

ጳውሎሳ ቡዞ ቆፋታ

9 ኤሌሳ ያዳ ታና ቤዓ። 10 ዴማሲ ሃ አላሚያን ዴዲያባታ ዶሲዲ፣ ታና አጊዲ፣ ቴሴሎንቄ ካታማ ቢስ። ቄርቂሲ ጋላቲያ ቢታ፣ ቃሲ ቲቶይ ዲልማዊያ ቢታ ቢስ። 11 ሉቃሳ ፃላሲ ታራ ዴዴስ። ማርቆሲ ያሳ አሶን ታና ማዳናው ዳንዳዲያ ጊሾ ኔራ

3:11 ሃ.አ 13:14-52፤ 14:1-20 * 4:8 ዊሎቴሳ ካላቻይ: ዊሎቴሳ ዴዎ ጊሾ ታ ኤካና ካላቻ። ዊሎቴሳ ታው ካላቻ አሲዲ ኢሜስ ጉሱ። 4:10 ቆላ 4:14፤ ፊልሞ 24፤ 2ቆሮ 8:23፤ ጋላ 2:3፤ ቲቶ 1:4

ኤካዳ ያ። 12 ታኒ ቲኪቆሳ ኤፌሶና ካታማ ኪታስ። 13 ኔኒ ያሹ፥ ዓርዳዳ ካታማን ካርፖሳ ማታን አጋዳ ዩዳ ታ ኮቲያኔ ማፃፋታ ታው ኤካዳ ያ። ኡባካ ጋልባን ፃፌቲዳ ማፃፋታ ኤኮና ዮፓ።

14 ቢራታ ቆዒያ ኢስኪንዲሬይ ታና ዳሮ ቆሂስ፤ ጎዳይ ኢያ አሱዋዳ ኢያው ዛራና። 15 ኢ ኑ ቲሚርቲያ ዳሮ ኢዒያ ጊሾ ኢያፎ ኔና ናጋ።

16 ኮይሮ ታ ሞቴቲያ ዎዴ ኡባይ አጊዲ ቢዶሶናፎ አቲን አኒካ ታና ማዲቤና። ያሳይ ሄ ባላ ኤንታው ታይቦፖ። 17 ሺን ታኒ ኩሜላ ኪታ አይሁዴ ጊዶና አሳ ኡባስ ማርካቲን፥ ኤንቲ ሲዓና ሚላ ጎዳይ ታ ማታን ኤቂዲ ታው ዎልቃ ኢሚስ። ቃሲ ኮሻቲዳ ጋሞዳ ዶና ዶዩዳ ሃይቁሞፎ ታና አሺስ። 18 ጎዳይ ታና ኢታ ኡባፌ አሺዲ ባ ሳሎ ካዎቴሳ ሳሮን ኤፋና። ኢያው ሜሪናፎ ሜሪና ጋካናው ቦንቾይ ጊዶ። አሚንዲ።

ዉርሴሳ ሳሮሶ

19 ጲሪስቂላስ፥ አቂላሲኔ አኔስፎራ ሶ አሳስ ታ ሳሮሱዋ አዳ።
20 ኤራስዎሲ ቆሮንቶሳ ካታማን አቲስ። ዓርፊሞሲ ሃርጌቲዳ ጊሾ ሚሊዔ ካታማን አጋስ። 21 ባልጎይ ጌላናፎ ሲንጴ ኤሌሳዳ ያ። ኤዉቡሉሲ፥ ጲዴሲ፥ ሊኑሲ፥ ቂላዴይኔ ሃራ አማኒያ አሳቲ ኡባይ ኔና ሳሮ ሳሮ ጎሶና።
22 ጎዳይ ዩሱስ ኪሪስቶሲ ኔ አያናራ ጊዶ። ያሳ ማሮቴሳይ ሂንቴ ኡባራ ጊዶ።

4:11 ቆላ 4:14፤ ፊልሞ 24፤ ሃ.አ 12:12፤ 25፤ 13:13፤ 15:37-39፤ ቆላ 4:10
4:12 ሃ.አ 20:4፤ ኤፌ. 6:21-22፤ ቆላ 4:7-8 4:14 1ዓሞ 1:20፤ ማዝ
62:12፤ ሮሜ 2:6 4:19 ሃ.አ 18:2፤ 2ዓሞ 1:16-17 4:20 ሃ.አ 19:22፤
ሮሜ 16:23፤ ሃ.አ 20:4፤ 21:29

አራሳ ጫቁዋ ጎፋሉ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 12 Mar 2019 from source files dated 12
Mar 2019
c35d6c73-3843-5482-b53e-7559d35deee5